



RESOLUCIÓN DO 21 DE MARZO DE 2022, DA SECRETARÍA XERAL DE EDUCACIÓN E FORMACIÓN PROFESIONAL, POLA QUE SE CONVOCA A PROBA EXTERNA DO PROGRAMA DE DOBRE TITULACIÓN DE BACHARELATO E BACCALAURÉAT PARA O CURSO ACADÉMICO 2021/2022 E SE DITAN INSTRUCCIÓN PARA O SEU DESENVOLVEMENTO.

O Real Decreto 102/2010, de 5 de febreiro, modificado polo Real Decreto 95/2014, do 14 de febreiro, polo que se regula a ordenación das ensinanzas acollidas ao acordo entre o Goberno de España e o Goberno de Francia relativo á dobre titulación de Bacharelato e de *Baccalauréat* en centros docentes españois.

A Orde EDU/2157/2010, de 30 de xullo, modificada pola Orde ECD/1961/2015, do 24 de setembro, pola que se regula o currículo mixto das ensinanzas acollidas ao Acordo entre o Goberno de España e o Goberno de Francia relativo á dobre titulación de Bacharelato e de *Baccalauréat* en centros docentes españois, así como os requisitos para a súa obtención, no seu artigo 4, establece que o alumnado dos centros docentes españois que cursa as ensinanzas acollidas ao Acordo citado realizará unha proba externa sobre as materias específicas do currículo mixto correspondentes ao segundo curso de Bacharelato.

A Resolución do 9 de xuño de 2017, da Dirección Xeral de Educación, Formación Profesional e Innovación Educativa pola que se regula a incorporación ao programa de dobre titulación de Bacharelato e *Baccalauréat* -*Bachibac*- en centros educativos sostidos con fondos públicos da Comunidade Autónoma de Galicia para o curso 2017/2018.

A Resolución de 22 de setembro de 2021, da Secretaría de Estado de Educación, pola que se ditan instrucións relativas ao programa de dobre titulación *Bacharelato-Baccalauréat* correspondentes ao curso 2021/2022.

En consecuencia, e co fin de coordinar a organización e desenvolvemento da proba externa para a obtención da dobre titulación de Bacharelato e de *Baccalauréat*, é necesario ditar instrucións relativas ao desenvolvemento da mesma.

En virtude do cal, e en exercicio das súas competencias, esta Secretaría Xeral

RESOLVE

Primeira. *Obxecto e ámbito de aplicación.*

Esta resolución ten por obxecto convocar para o curso 2021/2022 a celebración da proba externa sobre as materias específicas do currículo mixto do programa de dobre titulación de Bacharelato e *Baccalauréat* para o alumnado de segundo de Bacharelato que, no presente curso académico, estea cursando o currículo mixto do programa *Bachibac* establecido por Orde EDU/2157/2010, de 30 de xullo.



Segunda. Inscripción do alumnado.

1. Poderá presentarse á proba externa do Baccalauréat o alumnado de segundo de Bacharelato que estea cursando o currículo mixto do programa *Bachibac* establecido por Orden EDU/2157/2010, de 30 de xullo.
2. Cada alumno ou alumna poderá concorrer a unha soa convocatoria por curso académico.
3. O alumnado que desexa acceder á proba deberá formalizar a súa inscrición na secretaría do centro educativo no período comprendido entre o 28 e o 30 de marzo de 2022 cubrindo o modelo de solicitude establecido no Anexo I desta resolución. O prazo de presentación de solicitudes rematará o día 30 de marzo de 2022.
4. Nos tres días seguintes ao remate do prazo de inscrición, a dirección do centro fará público no taboleiro de anuncios do centro o listado do alumnado admitido no acceso ás probas e, se fose o caso, o alumnado excluído, indicando as razóns da súa exclusión e concedendo un período de dous días hábiles para emendar ou corrixir os posibles erros.
5. Finalizado este prazo a dirección do centro fará pública a listaxe definitiva de aspirantes á proba e remitirá á Consellería de Cultura, Educación e Universidade da Xunta de Galicia a relación do alumnado inscrito nela, segundo o modelo establecido no Anexo II desta resolución.
6. En calquera caso, a exposición dos datos do alumnado respectará o previsto na Lei Orgánica 3/2018, de 5 de decembro, de Protección de Datos Personais e Garantía dos Dereitos Dixitais.

Terceira. Contidos da proba externa.

A proba versará sobre as materias específicas do currículo mixto correspondente ao segundo curso de Bacharelato -Lingua e Literatura Francesas e Historia de España e de Francia- e axustarase ao establecido na Orde EDU/2157/2010, do 30 de xullo, pola que se regula o currículo mixto das ensinanzas acollidas ao Acordo entre o Goberno de España e o Goberno de Francia relativo á dobre titulación de Bacharelato e de *Baccalauréat* en centros docentes españois, así como os requisitos para a súa obtención.

Cuarta. Estrutura da proba externa.

A proba externa constará de dúas probas, unha de Lingua e Literatura Francesas e outra sobre a materia de Historia de España e de Francia. Ambas as probas realizaranse integramente en francés e adaptaranse ao nivel B2 do Marco Común Europeo de Referencia para as Linguas. Non se permitirá o uso de dicionario en ningunha das probas.

Tanto na proba de Lingua e Literatura Francesas, no seu exercicio oral e escrito, como na de Historia de España e de Francia, valorarase prioritariamente a coherencia na expresión, así como o seu enfoque e desenvolvemento. Todos estes elementos, así como a fluidez e organización do discurso, recibirán unha consideración máis relevante que os erros ocasionais de expresión ou ortografía no texto ou no discurso oral. O obxectivo final das probas é a percepción da capacidade de análise e a madurez na expresión propias dun usuario independente avanzado, tal e como precisa o Marco Común Europeo de Referencia para as Linguas.



1. Proba de Lingua e Literatura Francesas.

A proba de Lingua e Literatura Francesas consistirá nun exercicio escrito e outro oral. O exercicio escrito constará de dúas partes, cada unha delas de dúas horas de duración.

1.1. Proba escrita de Lingua e Literatura Francesas.

A Proba escrita de Lingua e Literatura Francesas constará de dúas partes de dúas horas de duración cada unha.

1.1.1. A primeira parte, de preguntas e redacción, realizarase a partir dun texto que poderá ir acompañado dun documento gráfico. O alumno/a alumna deberá elaborar un comentario respondendo a unhas cuestións que permitan avaliar a comprensión do mesmo e unha redacción, de 250 palabras como máximo, sobre o texto proposto. A resposta a cada unha das cuestións deberá ter unha extensión de 70 palabras (+/- 20%).

O obxectivo que se pretende coa redacción é demostrar a independencia crítica do alumnado como usuario avanzado. A redacción deberá recoller unha opinión argumentada sobre o texto ou sobre un tema estreitamente relacionado con este.

1.1.2. A segunda parte consistirá na elaboración dun ensaio, de 300 palabras como máximo, sobre unha cuestión referente ao tema de estudo fixado pola Comisión de seguimento que, para a convocatoria de 2022, é “ *L’Éducation* ”. As dúas obras literarias que desenvolven o tema para a esta segunda parte do exercicio escrito son: « *Balzac et la Petite Tailleuse chinoise* », de Dai Sijie e « *Chagrin d’école* », de Daniel Pennac.

O sentido deste exercicio é a elaboración dun texto de carácter argumentativo que permita percibir a madurez e o rigor na exposición das ideas do alumnado que concorre á proba.

1.2. Proba oral de Lingua e Literatura Francesas.

A proba oral de Lingua e Literatura Francesas constará de dúas partes e terá unha duración de 40 minutos.

1.2.1. A primeira parte, de 20 minutos de duración, dedicarase á preparación dun tema a partir dun texto e/ou gráfico proposto, relacionado cos contidos traballados no 2º curso de Bacharelato. O texto irá acompañado dunha imaxe e de catro ou cinco cuestións relacionadas co mesmo para poder guiar e orientar a intervención da persoa candidata.

1.2.2. A segunda parte, de 20 minutos de duración, dedicarase á avaliación da comprensión e expresión orais, tanto individualmente como en interacción, a partir do documento proposto.

Por acordo adoptado pola Comisión Técnica a proba oral tomará como base un texto, elixido por o alumno ou alumna entre dúas opcións, que irá acompañado dunha imaxe e de algunhas anotacións orientativas.

Transcorridos os vinte minutos de preparación, os outros vinte minutos dedicados á avaliación da comprensión e expresión oral distribuiranse en dous bloques equitativos. Cada un deles estará dedicado ás tarefas seguintes:



-discurso monolóxico: a partir dun motivo gráfico e/ou textual con instrucións relacionadas, o alumno/a alumna deberá realizar unha exposición discursiva monóxica segundo se indique nas instrucións específicas.

-discurso interactivo: tras a exposición, o alumno/a alumna someterase ás preguntas que o tribunal estableza respecto dos aspectos expostos e procederá a unha conversa guiada -incluíndo elementos de argumentación e negociación- sobre as cuestións propostas.

1.3. Para cada exercicio proporanse dúas opcións diferentes entre as que cada estudante deberá elixir unha.

2. Proba de Historia de España e de Francia.

A proba de Historia de España e de Francia será escrita e constará de dúas partes de dúas horas de duración cada unha.

2.1. A primeira parte consistirá na realización dun comentario sobre un texto e/ou documento gráfico. O obxectivo da proba é que o alumnado interprete de forma razoada o documento proposto, no que se abordará unha problemática sobre unha cuestión relacionada coa Historia dos séculos XIX ao XXI. Trátase de que o alumno/a alumna realice unha reflexión coherente fundamentada no contraste das ideas e datos do documento cos coñecementos adquiridos sobre o tema proposto e responda argumentando as súas opinións. Para iso, deberá responder a tres cuestións:

2.1.1 Presentación do texto e/ou documento gráfico e exposición do tema ou idea principal do mesmo. A extensión da resposta será de, aproximadamente, 80 palabras (+/- 20%).

2.1.2. Explicación do contexto histórico relacionado co documento gráfico e/ou o texto proposto. A extensión da resposta será de, aproximadamente, 80 palabras (+/- 20%).

2.1.3. Redacción sobre a problemática plantexada. A resposta elaborárase mediante unha reflexión organizada, asociando os coñecementos persoais e as informacións obtidas a partir dos documentos propostos. A extensión aproximada será de 200 palabras (+/- 20%).

2.2. A segunda parte consistirá no desenvolvemento dun tema relacionado co currículo integrado. Trátase de que o alumno ou alumna redacte un texto ben organizado, dunha extensión aproximada de 300 palabras (+/- 20%), que permita percibir a madurez así como o coñecemento dos contidos máis relevantes do tema proposto. Deberá incluír unha ou dúas frases introdutorias, distinguindo en parágrafos diferentes as ideas principais que responden ao tema plantexado, e finalizar cunha ou dúas frases a modo de conclusión ou resposta.

O obxectivo de ambas as dúas probas é poñer de manifesto un espírito crítico, utilizando estratexias lingüísticas axeitadas que demostren unha expresión escrita, ordenada e coherente, cunha utilización do vocabulario propia da materia de Historia de España e Francia así como do nivel de lingua requirido.

2.3. Para cada parte proporanse dúas opcións diferentes entre as que cada estudante deberá elixir unha.



Quinta. *Datas, horario e lugar de realización das probas.*

1. Cada alumno ou alumna inscrito poderá concorrer a unha soa convocatoria por curso académico na que se examinará das dúas materias obxecto da proba: Lingua e Literatura Francesas e Historia de España e de Francia.

2. A parte escrita da proba externa realizarase os días 9 e 10 de maio de 2022:

- luns, 9 de maio: exame escrito de Lingua e Literatura Francesas.
- martes, 10 de maio: exame escrito de Historia de España e de Francia.

O horario establecido para o desenvolvemento das distintas partes das probas escritas será o seguinte (hora peninsular):

- primeira parte: de 09:30 a 11:30.
- segunda parte: de 12:00 a 14:00.

3. A proba oral terá lugar os días 9 e 10 de maio a partir das 15.30 horas.

Con anterioridade á proba oral, o tribunal avaliador realizará a convocatoria do alumnado á proba facendo pública a dita convocatoria no taboleiro do centro.

4. Con carácter excepcional realizarase unha proba externa extraordinaria que estará reservada unicamente para o alumnado que, por razóns de forza maior, que deberán ser acreditadas documentalmente e estimadas pola Administración educativa, non puidera presentarse ás probas ordinarias.

De teren lugar, estas probas realizaríanse os días 18 e 19 de maio de 2022 nas seguintes quendas:

- mércores, 18 de maio: exames escrito e oral de Lingua e Literatura Francesas (mañá e tarde, respectivamente).
- xoves, 19 de maio: exame de Historia de España e de Francia.

5. Se no momento de realización da proba se mantiveran vixentes as circunstancias extraordinarias derivadas da pandemia xerada pola COVID-19, e exclusivamente para o alumnado que, a causa de a necesidade de gardar cuarentena derivada de infección por SARS-CoV-2 prescrita polas autoridades sanitarias, non puidera presentarse ás convocatorias ordinaria ou extraordinaria, prevese a realización dunha convocatoria especial para os días 20 e 23 de maio de 2022.

6. A proba ordinaria e, de ser o caso, a extraordinaria, terá lugar no *IES Plurilingüe Xosé Neira Vilas* de Oleiros (A Coruña). Corresponderalle á dirección do centro xestionar e coordinar a realización da dita proba e velar polo seu correcto desenvolvemento.



Sexta. Tribunal avaliador.

1. A Secretaría Xeral de Educación e Formación Profesional, en exercicio das súas competencias e de acordo co artigo 7.2 do Real Decreto 102/2010, do 5 de febreiro, nomeará un tribunal avaliador da proba externa.
2. O tribunal estará formado por, cando menos, tres examinadores pertencentes aos respectivos corpos de Catedráticos ou Profesores de Ensinanza Secundaria da Comunidade Autónoma de Galicia. Estará composto por un/unha presidente/a -profesor/a especialista de Lingua Francesa- e dous vogais, un/unha profesor/a especialista de Lingua Francesa e outro/a profesor/a de Xeografía e Historia que deberá ter a correspondente habilitación para impartir a materia en lingua francesa. O profesor ou profesora de menor idade realizará as funcións de secretario/a do tribunal.
3. Correspóndelle ao tribunal o control da realización das probas así como avalialas, cualificalas e cubrir as actas de avaliación.
4. O tribunal velará pola correcta realización das probas, documentará e motivará a cualificación que outorgue e actuará, en todo momento, de forma colexiada.
5. De acordo co disposto no apartado 2 do Artigo 7 do Real Decreto 102/2010, do 5 de febreiro, a Administración francesa poderá designar os seus representantes no procedemento.

Sétima. Cualificación das probas e actas de avaliación.

1. Con antelación á celebración da proba o tribunal examinador fará públicos os criterios de cualificación aplicables, remitíndoos ao centro onde se imparte o programa.
2. A cualificación global da proba externa obterase coa media aritmética das cualificacións obtidas nas probas de cada unha das materias específicas, expresada con dous decimais.
3. Segundo se determina no artigo 7.2 da Orde EDU/2157/2010, do 30 de xullo, o alumnado que obteña unha cualificación inferior a 5 na cualificación global da proba ou na cualificación da materia específica de Lingua e Literatura Francesas non superará a proba externa. Nestes casos consignarase «*NON APTO*» no correspondente recadro da columna de cualificación global da proba externa.
4. As cualificacións de cada un dos exercicios serán numéricas, de 0 a 10 puntos, sen decimais. No caso de que, sen motivo xustificado, algún aspirante non se presentara a algunha das probas ou a parte das mesmas, será cualificado con 0 puntos na dita proba ou parte da mesma.
5. A cualificación da proba de Lingua e Literatura Francesas obterase coa media aritmética das cualificacións dos dous exercicios que a integran, escrito e oral, cun decimal se é o caso.
6. A cualificación global da proba externa do *Baccalauréat* será válida cando se teñan superado todas as materias do Bacharelato. De acordo co establecido no artigo 8 da Orde EDU/2157/2010, do 30 de xullo, a cualificación final para a obtención do título de *Baccalauréat* será o resultado de aplicar a seguinte fórmula:

$$\text{Cualificación do } \textit{Baccalauréat} = \text{NMB} * 0,7 + \text{CGPE} * 0,3$$



NMB = Nota media do Bacharelato.

CGPE = Cualificación global da proba externa.

7. Das cualificacións das probas levantarase acta asinada por todos os membros do tribunal, segundo o modelo do Anexo III da presente resolución. O tribunal avaliador enviará unha copia da acta asinada e selada á Consellería de Cultura, Educación e Universidade da Xunta de Galicia.

8. Unha vez concluído o proceso de avaliación a dirección do centro fará públicos os resultados obtidos nas diferentes probas.

9. A dirección do centro educativo será a encargada da garda e custodia das actas do seu alumnado.

Oitava. Reclamacións.

1. Aqueles alumnos ou alumnas que mostrasen desconformidade coa cualificación obtida poderán solicitar por escrito á secretaria do centro a revisión da corrección das probas no prazo de tres días hábiles a partir da exposición dos resultados no taboleiro de anuncios do centro. A exposición dos mesmos respectará o previsto na Lei Orgánica 3/2018, de 5 de decembro, de Protección de Datos Personais e Garantía dos Dereitos Dixitais.

2. De existir reclamacións, o/a presidente/a do tribunal deberá reunir os seus membros en sesión extraordinaria para decidir a confirmación ou modificación dos resultados, que serán comunicados á persoa interesada no prazo de dous días hábiles. Desta resolución levantarase acta asinada por todos os membros do tribunal.

Novena. Emisión de certificados e tramitación do título de *Baccalauréat*.

1. O alumnado que supere a proba externa específica obterá o título de *Baccalauréat* outorgado polo Ministerio de Educación Nacional Francés. A cualificación global da proba externa do *Baccalauréat* será válida cando se teñan superadas todas as materias do Bacharelato.

2. A dirección do centro educativo formulará, de oficio e coa necesaria celeridade, as solicitudes de expedición do título de *Baccalauréat* para o alumnado que reúna as condicións. A tal efecto, cubrirá unha táboa informática de datos que a Secretaría Xeral de Educación e Formación Profesional porá á súa disposición e que responderá ao acordado entre as Administracións española e francesa.

3. A partir da dita táboa a persoa secretaria do centro educativo emitirá unha certificación selada e asinada, co *Visto e Prace* da persoa directora, seguindo o modelo do Anexo IV da presente resolución, dando fe de cantos datos se requiren. A dirección do centro remitirá unha copia escaneada da dita certificación á Secretaría Xeral de Educación e Formación Profesional da Consellería de Cultura, Educación e Universidade que, á súa vez, a trasladará á Subdirección General de Ordenación Académica. Elaboraranse dous exemplares de cada certificación: un deles entregarase á persoa titular da mesma e o outro conservarse no centro e poderá ser solicitado para a súa oportuna revisión, de ser requirido pola parte francesa.



4. A certificación será tramitada ante a autoridade francesa co obxecto de que esta emita a oportuna *attestation* (certificación) que permita ao alumnado do programa *Bachibac* acceder á universidade española.
5. Nas solicitudes de expedición do Diploma de *Baccalauréat* faranse constar os dous *enseignements de spécialité* que cada titular desexe que consten no mesmo, en función das materias cursadas e de acordo co establecido no Anexo V desta resolución.
6. A solicitude de expedición do título de *Baccalauréat* dirixirase telemáticamente á Secretaría Xeral de Educación e Formación Profesional que, á súa vez, o remitirá á Subdirección General de Ordenación Académica para o seu traslado á Administración francesa. Unha vez recibidos os títulos, realizarase o procedemento inverso.
7. O Ministerio de Educación e Formación Profesional encargarse de tramitar coa Administración francesa a expedición do título de *Baccalauréat* do alumnado que reúna as condicións para obter o Título de Bacharelato, nas datas que se determinen en función da celebración das avaliacións finais ordinarias e extraordinarias nas distintas Comunidades Autónomas.
8. De acordo co establecido no artigo 10 da Orde EDU/2157/2010, do 30 de xullo, no seu artigo 10, a Administración educativa asegurará que, tanto no expediente académico como no historial académico de Bacharelato do alumnado, se recolle, mediante dilixencia, segundo o modelo incluído no Anexo II da citada orde, que o alumnado superou as ensinanzas do currículo mixto e que acadou o nivel B2 en lingua francesa no Marco Común Europeo de Referencia para as Linguas. Así mesmo, nas actas de avaliación de Bacharelato farase constar, no seu caso, a referencia expresa ao Real Decreto 102/2010, do 5 de febreiro, que regula as ensinanzas do currículo integrado.

Décima. Supervisión do funcionamento do programa.

En virtude do establecido no artigo 5 do Acordo relativo á dobre titulación de Bacharelato e *Baccalauréat*, do 10 de xaneiro de 2008, as inspeccións educativas francesa e española poderán supervisar o funcionamento deste programa no centro educativo no que estea implantado.

Décimo primeira-. Datos de carácter persoal.

Os datos persoais recadados neste procedemento serán tratados na súa condición de responsable pola Xunta de Galicia, Consellería de Cultura, Educación e Universidade, coas finalidades de levar a cabo a tramitación administrativa que derive da xestión deste procedemento e a actualización da información e contidos da carpeta do cidadán.

O tratamento dos datos baséase no cumprimento dunha misión de interese público ou no exercicio de poderes públicos, conforme a normativa recollida na ficha do procedemento incluída na Guía de procedementos e servizos, no propio formulario anexo e nas referencias recollidas en <https://www.xunta.gal/informacion-xeral-proteccion-datos>. Con todo, determinados tratamentos poderán fundamentarse no consentimento das persoas interesadas e esta circunstancia reflectirase no devandito formulario.



Os datos serán comunicados ás Administracións públicas, organismos e/ou entidades que participan neste plan no exercicio das súas competencias, cando sexa necesario para a tramitación e resolución dos seus procedementos ou para que os cidadáns poidan acceder de forma integral á información relativa a unha materia.

A fin de darlle a publicidade esixida ao procedemento, os datos identificativos das persoas interesadas serán publicados conforme ao descrito na presente norma reguladora a través dos distintos medios de comunicación institucionais dos que dispón a Xunta de Galicia como Diarios Oficiais, páxinas web ou taboleiros de anuncios.

As persoas interesadas poderán acceder, rectificar e suprimir os seus datos, así como exercer outros dereitos ou retirar o seu consentimento, a través da sede electrónica da Xunta de Galicia ou presencialmente nos lugares e rexistros establecidos na normativa reguladora do procedemento administrativo común, segundo se explicita na información adicional recollida en <https://www.xunta.gal/proteccion-datos-persoais>.

No caso de existir diferentes referencias normativas en materia de protección de datos persoais neste procedemento, prevalecerán en todo caso aquelas relativas ao Regulamento (UE) 2016/679, Xeral de Protección de Datos ou a Lei Orgánica 3/2018, de 5 de decembro, de Protección de Datos Persoais e garantía dos dereitos dixitais.

José Luis Mira Lema

Secretario xeral de Educación e Formación Profesional